

奉天通志

第七函之三

奉天通志卷九十七

禮俗志

記曰安上治民莫善於禮移風易俗莫善於樂又曰君子行禮不求變俗蓋禮與俗相因因地異宜謂之俗俗定約成者謂之禮俗爲禮之因而禮爲俗之果未有離俗而能成禮者然又云移風易俗何也俗有美惡宜汰惡而存美所謂易者易此而已故善言禮者因其故俗而利導之而不求變俗自來修志者每以禮俗並志由斯道也奉省之禮俗其原有三一曰先民之故俗二曰中原之新俗三曰沿習之禮制漢書地理志謂遼東地廣民稀終不相盜無門戶之閉婦人負信不淫辟其田民飲食以籩豆都邑頗放效此先人故俗之美者也又謂吏及內郡賈人往往以杯器食郡初

取吏於遼東吏見民無閉藏及賈人往者夜則爲盜俗稍益薄此則染中原之汙俗矣又三國魏志管寧傳寧居遼東井汲者或男女相雜或爭并鬪鬪此故俗之汙者也寧遂講詩書陳俎豆飾威儀明禮讓民化其德此又化以中原之美俗矣中原之民歷代皆有移植而以齊魯幽燕之民爲多其毗於南者則俗於齊魯爲近毗於西者則俗於幽燕爲近其毗於東北者則土著多而移植之人少故往往能保其故俗女眞之爲金滿洲之爲清皆起於東北而入據中原既能保守其俗於故鄉又能移植其民於內地久之其俗亦不能保而漸漬於漢化蓋故俗樸而失之野新俗文而流於僞二者各有短長而奉省之俗漸能去野而存樸則劑以新俗之效也若夫婚喪禮制各地習俗不同而大體齊一旦多同於內

地蓋皆出於沿習之效清代頒訂通禮官署遵守罔越吳榮光氏之吾學錄亦爲仕宦所習用獨於庶民之常禮殊無規制而士庶之家所遵行者乃爲文公家禮一書或謂家禮非朱子作然此邦人乃視爲不刊之常典抑亦奇矣其有整齊畫一之效者亦以此也綜而言之奉省俗重於禮而禮卽寓於俗中舍俗而言禮卽禮亦不可考矣茲分十三目曰典禮曰風俗曰節令曰歲時曰婚嫁曰喪葬曰祭祀曰神教曰居室曰衣服曰飲食曰器用曰方言方言一目無與於禮而可以考見風俗故以附焉述禮俗志第六凡得四卷

禮俗一

典禮
風俗

典禮

班固曰人函天地陰陽之氣有喜怒哀樂之情天稟其性而不能節也聖人能爲之節而不能絕也故象天地而制禮樂所以通神明立人倫正情性節萬事者也人性有男女之情妬忌之別爲制婚姻之禮有交接長幼之序爲制鄉飲之禮有哀死思遠之情爲制喪祭之禮有尊卑敬上之心爲制朝覲之禮昔漢高祖設朝燕會諸功臣或飲酒酣歌拔劍擊柱叔孫通爲制禮儀朝庭肅然高祖歎曰吾乃今日知爲天子之貴也是故孔子曰安上治民莫善於禮又曰揖讓而天下治者禮樂之謂也是以古之有天下者皆重之奉省疆域昔爲諸族雜據若夫餘鮮卑若高句麗渤海若遼金元或據其境之一部或據其境之全部然世質民純典禮未備若夫金俗之插柳射天渤海之回旋踏舞雖爲禮樂之權輿至於

郊天耕藉宗廟朝會諸大典考之載籍莫或能詳及清建號盛京規模粗具逮定鼎燕都典制始彰荀卿子曰欲觀聖王之跡則於其粲然者矣其是之謂乎故本篇所紀典禮詳於清代如巡典祭陵迎詔迎冊寶節令慶賀耕藉鞭春鄉飲祀文廟祀關廟諸典禮式悉本會典通禮所載分條序列焉述典禮

巡幸 清自定鼎燕京以盛京爲陪都自康熙以下諸帝時祭祖陵兼省方土其巡幸儀式車駕啓行之日鑾儀衛陳騎駕鹵簿鳴角饒歌大樂饒歌清樂於車駕所出禁門外扈從王公各官服行衣佩弓矢留京王公百官蟒袍補服按翼列序門外祇候皇帝御行衣乘輿出宮導從扈衛如常儀鼓吹振作鹵簿前導扈從王公各官咸跪候過乘騎隨發留京王公百官跪送候過

各退鑾輿經過地方文武各官咸朝服率紳士耆民於御道右百步外跪迎跪送至奉天城外盛京將軍以下文武各官咸朝服豫出郊至駐蹕行營外道右序立駕至跪候過隨至行營恭

請聖安各退翌日皇帝躬祭陵寢

見典後禮

禮成入城御崇政殿詔

案表案陳設各如儀皇帝御禮服隨駕王公並蒙古王等在崇政殿外左右排立隨駕文武各官在丹墀東盛京文武各官在丹墀西皆按品級排立朝鮮使臣等附西班牙之末王公百官咸朝服進表宣表行禮頒詔如儀若值行在所朝賀皇帝御帳殿皇子王公以下文武二品以上官在網城外按翼排班行禮回

鑾恭送亦如之

會典二十七八

迎詔 詔下直省所過府州縣五里之內文武官朝服跪迎軍民

伏道右候過省會有司豫於公廨設詔案香案案東設臺詔及郊備龍亭旗仗出迎使者承詔書以架恭奉安置龍亭內乘馬後隨鼓樂前導文武大僚率所屬官朝服出迎道右跪候過興先至公廨門外序立紳士耆老軍民咸集詔至門跪迎如初使者下馬隨龍亭入衆隨入使者奉詔書陳於案退立案東西面引禮生引各官就位班次如朝賀儀紳士在文官之末耆老軍民在武官之末通贊贊跪叩興衆行三跪九叩禮贊宣詔使者奉詔授宣詔官復位立宣詔官跪接登臺展詔書官二人從升均西面展詔書宣讀訖復於案退衆聽贊復行三跪九叩禮使者以詔授將軍副都統提鎮副將參將轉頒所屬營汛至日宣

布軍民均如儀

會典三十

迎冊寶 恭送實錄聖訓於盛京則奉書儲於行箱陳於龍亭欽
派王公一人禮部工部堂官各一人侍衛十人館派提調官一
人纂修官二人禮部工部各派司官一人筆帖式一人欽天監
派官一人護送護送官詣館行三跪九叩禮蓋旗御仗作樂如
儀出朝陽門樂止載以行駕綵亭蓋旗儀仗如初所過守土官
朝服跪道左迎送至奉天城外盛京將軍備綵亭鼓樂派官前
引將軍五部侍郎府尹承威率其屬出郭跪迎引入恭設崇政
殿案上各官行三跪九叩禮提調等官同盛京五部司官行一
跪三叩禮按次包裹畢再行一跪三叩禮擇吉仍設綵亭送往
之王大臣等及將軍以下各官詣案前行一跪三叩禮奉設亭
內行禮如初恭送至崇謨閣前衆行禮如初提調等官同盛京

五部司官恭奉尊藏畢衆行三跪九跪禮退

會典二十七

慶典 三大節朝賀之禮省會及各府州縣豫於公所正中恭設

皇帝萬歲萬萬歲龍牌於亭南嚮設香案於亭之南是日五鼓有司設燎於庭設鐙於門廡省用道員或府同知一人府用同知或通判如無同知通判用教官一人州縣均用教官一人糾儀學生員二人通贊二人引班省會班次將軍總督加將軍銜提督爲一班巡撫副都統提督學政爲二班總兵協領參領織造督關郎中布政使按察使各道爲三班佐領督關員外郎知府副將參將爲四班防禦督關主事司庫同知通判遊擊都司爲五班驍騎校知州知縣教職守備爲六班有品級筆帖式庫使經歷州同州判鹽大使由進士舉人出身者列第六班遇有

欽差人員一二品大臣列第一班之首三品以下之京堂列第二班之首五品以下之部院官均列第二班之末滿洲蒙古護軍分左右翼漢官文東武西立位東西面北上拜位北面東班西上西班東上糾儀官位班行之北通贊引班位糾儀官之南東西面夜漏未盡朝服畢會質明引班引入至丹墀內序立通贊贊齊班引班分引至拜位前立贊進步進贊跪叩興各行三跪九叩禮畢引退府不附省縣不附府者文武官於公所按班行禮均如省會儀

會典三十

鄉飲禮 歲孟春望日孟冬朔日舉鄉飲酒之禮以守牧令爲主

人省會及監司分駐之地皆以監司眡其禮以鄉之年高六十以上有德行者一人爲賓其次一人爲介又其次爲衆賓以教

官一人爲司正學弟子習禮者二人司爵二人贊禮二人引禮
一人讀律令僚佐皆與前期戒賓賓禮辭許戒介亦如之先一
日司正率執事者詣講堂肄儀設監禮席次於庭東北向布賓
席於堂西北南向主人席於東南西向介席於西南東向衆賓
之長三人席於賓西南向東上皆專席不屬衆賓席於西序東
向僚佐席於東序西向皆北上司正席於主人之東北向

如大有鄉大

夫來觀禮者坐於東北一饌二席南向二三品設律令案一於主
席西向無則缺之不立一饌二饌之三品

介間正中東西肆又設尊案一於東序端南北肆設樂縣於西

階下如儀

右陳設
布席

屆日質明執事者入具饌設尊於案實酒於

尊加幂勺觶爵在尊北讀律者奉律令陳於中案旣辨監禮者
朝服詣學官就次監禮主人率司正及僚屬咸朝服入迺使人

速賓介主人立東階下西面僚佐序立於主人之後西面北上
司正讀律令者立僚佐之南北面西上贊禮者一人立東階下
又一人立庠門之外均西面屆時賓介盛服至序立於庠門外
之右介居賓南衆賓居介南皆東面北上執事者以賓至告於
主人主人出迎賓西面揖賓介以下東面答揖主人入門左賓
揖介介揖衆賓以次入門右當階主人揖及階揖賓皆答揖主
人與賓讓升三讓賓三辭主人升賓迺升主人東階上賓西階
上贊者贊拜主人西面再拜賓東面答拜興卽席主人降階延
介一讓升介升拜如賓禮就位主人乃延衆賓衆賓以次皆升
主人揖賓長皆答揖衆賓卽席主人率僚佐以下咸卽席贊禮
者贊揚觶執事者引司正由東階升詣堂中北面立賓介皆起

立贊揖司正揖賓介以下答揖司爵詣酒尊所舉冪酌酒於觶
進授司正司正揚觶而語曰恭維朝庭率由舊章敦崇禮教舉
行鄉飲非爲飲食凡我長幼各相勸勉爲臣盡忠爲子盡孝長
幼有序兄弟恭內睦宗族外和鄉黨無或廢墮以忝所生讀
畢贊者贊司正飲酒司正立飲畢以觶授執事者反於案贊揖
司正揖賓介以下皆揖司正復位賓介以下皆坐贊讀律令執
事者舉律令案於堂中引禮引讀律令者就案前北面立賓介
主人以下聽贊咸起立旅揖如司正揚觶禮迺讀律令曰律令
凡鄉飲酒序長幼論賢良年高有德者居上其次序齒列坐有
過犯者不得干與違者罪以違制失儀則揚觶者以禮責之讀
畢復位賓主以下皆坐贊者贊供饌執事者舉饌案於賓前次

介次主人衆賓以下徧舉訖贊獻賓主人起離席北面主司爵
詣酒尊所酌酒實爵授主人主人受爵詣賓席奠於案稍退賓
避席立於主人之左贊拜主人再拜賓答拜皆復位立贊賓酢
主人賓立司爵酌酒授賓賓受爵介從詣主人席前拜送爵主
人答拜如前儀皆坐執事者徧獻三賓衆賓爵訖酒數行工升
歌周詩鹿鳴三章卒歌笙奏御製補南陔詩御製補白華詩御
製補華黍詩三章笙奏御製補由庚詩御製補崇邱詩御製補
由儀詩迺合樂歌周南詩關雎三章召南鵲巢三章卒歌工告
備出執事者行酒主賓以下飲無算爵贊禮贊徹饌衆起離席
主人率僚屬在東西上賓介在西東上皆北面贊拜主人再拜
賓介以下皆再拜賓降西階出介及衆賓從之庠門外之右東

面北上主人降東階出僚屬從送賓於庠門外之左西面旅揖
賓介退禮卒無愆監禮出主人率僚屬送於庠門外皆退

通禮
十四

四

祭陵 遇皇帝展謁盛京三陵具奏應行典禮開列堂官銜名其
隨駕王公大臣並隨至祭臺前之王公前引進爵大臣均奏請
欽派如皇帝初次謁陵奏請於駐蹕日詣陵行謁見禮禮節由
部恭進次日行大祭禮禮節由太常寺恭進皇帝御素服隨從
之王公百官均素服恭謁永陵皇帝於啓運殿之北門階下行
三跪九拜禮謁福陵昭陵於明樓前行禮奠酒舉哀皇帝謁陵
乘輿降輿之處均俟臨時酌擬具奏隨從王等均於下馬碑下
馬貝勒以下大臣侍衛三品官以上於未至下馬碑下馬謁陵

次日行大饗禮永陵於啓運殿福陵昭陵於隆恩殿御禮服隨從之王公百官均朝服恭請帝后神位奉安寶座南向帝后同案每案牛一羊二鑪鐙具酒四尊疏布幕勺具每位奉先制帛一羹飯脯醯十八器餅餌果實六十五器夏則薦瓜茶盃一金爵三有墊金匕三金筯三皇貴妃耐饗者設位於西旁東向素帛一餅餌果實五十四器餘同皇帝行三跪九拜禮王公百官隨行禮上香讀祝三獻禮畢至西明樓前西嚮立舉哀王公百官於陵寢門外舉哀御禮服不至明樓前舉哀禮畢仍更青長

袍褂

會典三十七

常祭 三陵清明孟秋望冬至歲暮四大祭開列盛京宗室官六人銜名送太常寺奏請欽派及期則監禮福陵昭陵大祭以將